

DEVOZION

I feghes del Sacro Cher sui monc de Fascia

Ence chest an l'è stat renovà la veiora tradizion del Tirol

Ogne an la terza domenìa d'ò Pèsca de mé vegn zelebrà te dut l Tirol la Domenìa del Sacro Cher de Gejù. Te chesta di l'è usanza veiora empeèr sù i feghes sui monc, te duta la valèdes, per recordèr l jurament de fideltà al Sacro Cher de Gejù del 1796, fat per domanèr la grazia de defener la patria da l'invajon franzouza de la trupes de Napoleon.

Aldidanché oramai l Tirol é despartì ma l'è stat mantegnù la medema fe religiosa al Cher de Gejù e per chest ogne an de jugn vegn amò empeà sù i feghes del Sacro Cher sui monc entornvia Busan e te la valèdes.

Valgugn più gregn, etres più picoi, de spes fac a cher con te mez la crousc. L'è n spetàcol rich de magia e de gran sugestion emotiva.

Ence te Fascia da dotrei egn en ca l'è endò stat viventà la veiora tradizion de gra a volontadives de desvalives gropes che se dèsc jù percheche no vae a morir fora deldut noscia veiora usanzas.

Sun Sas de la Crousc n fech per i 40 egn del Grop de Folclor

Ence chest an i volontadives del Grop Folk de Soraga en domenìa



I feghes empeè sun Sas de la Crousc dai volontadives del Grop de Folclor de Soraga.

ai 21 de jugn se à trapinà endò fin sun Sas de la Crousc e chest'outa i aea na rejon en più per renovèr la veiora tradizion di feghes del Sacro Cher: i 40 egn del Grop de Folclor de Soraga.

Per chest l'enjegner Andrea Pellegrin à enjignà n dessegn particulèr, l'à metù jù la pianta col numer 40 col zero a forma de cher e te mez na crousc. Aldò de chest dessegn i volontadives à cognù portèr sù passa 200 focoles, 160 i les à metudes te tera te toal de Toalac e dapò i les à empeèdes sù per formèr l dessegn. I les à metudes adertura dopies percheche les èrde delvers. Sumsom la punta enveze olache l'è la crousc i ge à dat fech a n mont de legna da èrder portèda sù su la cracs da Mirko Pederiva.

Ence chest an i era de n bel grop: l president del Grop de Folclor Luca Tomasello e so fra Andrea, Michele Decrestina, Fernando e Evi Brunel, Mirko Pederiva, Andrea Pellegrin, Paolo Pederiva, Luca Pederignana, Francesco Dellantonio Tasin e Alessandro Chiocchetti Tin.

I é ponté demez da Soraga jà entorn la does domesdi, i é jic con l'auto fin sotite l bait del Vedeler e dapò su fin su la punta a pe. I se à

tout dò e tacà fora ence la bandieres ladina, fascèna e chela del Tirol. Via per dut l di l'è stat bel ciaut ma entorn la sera sun punta à tacà a se levèr n fort vent. «Aon tacà a empear sù le focole entorn trei cart a le diesc canche tacaa a vègnir scur – ne à contà Luca – l ventaa debel, speraane

che l se chiete jù ajache de solit dò l'anterores l fasc coscita, enveze l'à seghità a ventar e canche empeaane sù le focole le se destudaa. No sion stac bogn de le tegnir empeade, ge aessa volù ge meter sora amò penzin ma no n'aane dò. Coscita aon proà a le tirar dute ensema per far amancol



L gran fech sun Sas de Pordoi empeà sù dai Scizeres de Fascia.

un gran fech soul. Che ira... aane fat dut polito, aane pissà fora l dessegn col numer 40 proprio per festejar l cedeane del Grop de Folclor de Soraga. Ma no la é jita fata, pecià, eraane duc scornacé e avellii.» Empeèr sù i feghes del Sacro Cher l'è na tradizion che l Grop de Folclor de Soraga à tacà endò e viventèr acà 5 egn e chest an chest moment l volea segnèr n coronament emportant di 40 egn de atività.

N auter gran fech é stat empeà su a 2.950 metres sun Sas Pordoi per endrez di Scizeres de Fascia: l Comandant Franco Rizzi e i Camerac Teodoro Rizzi e Marco Chiocchetti. Chiò i à portà sù n mont de cantineles e legna da èrder, i à cognù la menèr co la lesola fora per anter doi mures de neif, lassù en domenìa passèda l'era zero gradi. Enceben chest freit chisc trei ardi Scizeres à empeà sù n gran fech che se à podù veder da dalonc e i à renovà ence chest an la tradizion del veie Tirol.

Etres feghes é stac empeè sù ence da Le Crepate e sun Sas da Ciamp sora Moena e se podea n veder amò de etres ence su la Mendola, fora Neva Todescia e sul Cermis.

Monica Cigolla